



Dei avtroppande lærarane Ståle Eik og Bjørg Møyfrid Fredheim flankert av tidlegare rektor Vidar Haugland og kommunalsjef Asbjørn Skår

Lærarane ved skulen har i dag, på den siste skuledagen, teke avskil med to gode kolleger - Bjørg Møyfrid Fredheim og Ståle Eik. Begge har vore i skulen i 42 år og dei vart varmt takka for innsatsen under ei samkome på Systrene Nilsen. Der fekk Bjørg Møyfrid, som i dei siste to åra har vore klassestyrar for sjuandeklassingane, ei skikkeleg overrasking. Dei 7 elevane takka henne med eit flott program bestående av sketsj, dans og song.

Bjørg Møyfrid, som er frå Ljosnes, gjekk ut av lærarskulen i 1970 og kom til Uskedalen skule i 1986.

Her har ho innimellom lærargjeringa også hatt større ansvar i eigenskap av rektorvikar i to periodar. Ho forsikrar at ho aldri har angra på yrkesvalet. Hadde ho det, ville ho ikkje ha vore i skulen så lenge.

- Det har vore veldig kjekt. Men det er lenge nok, seier ho men legg til at ho ikkje har bestemte

planar for pensjonistlivet.

- Eg kjem til å ta ein dag om gongen og til dømes reise meir enn før, seier ho.

Ståle har vore 31 år ved skulen i Uskedalen men i tillegg kjem dei siste 10 åra då han har dreve skule på eigen gard for elevar som trong eit alternativ. Den siste perioden har vore utruleg kjekk og meiningsfylt, oppsummerar Ståle.

Han har samstundes vore gardbrukar, men kallar det ei hobby.

- Og no blir du gardbrukar på heiltid?

- Eg blir vel helst kårkall, ein som kan trø til hvis det er bruk for meg.

Tekst og foto: Ola Matti Mathisen